



KENYATAAN / SIARAN AKHBAR

**Bahagian Komunikasi Korporat
Perbadanan Putrajaya
Tel: 03-8887 7033 Faks: 03-8887 5013**

PERBADANAN PUTRAJAYA TERBIT TEATER PERTAMA

PUTRAJAYA, 17 September 2024 – Perbadanan Putrajaya (PPj) hari ini mengadakan sidang media bagi prapelancaran Teater Cinta Ahmad Mutawakkil (CAM) bersempena penganjuran Festival Budaya Putrajaya 2024 yang akan berlangsung pada 19 hingga 22 September ini, bertempat di Dataran Putrajaya, Presint 3. Majlis yang diadakan di Taman Ekuestrian Putrajaya ini turut dihadiri oleh Encik Amirul Haswendy Ashari selaku pengarah dan penulis skrip serta barisan pelakon yang akan membintangi teater tersebut, antaranya Shah Iskandar, Mimi Enirda, Geoff Andfre, Along Eyzendy, Ain Sufia, AG Hafiz, Md Husin dan lain-lain.

Persembahan teater yang diadakan julung kalinya pada skala besar ini akan dipentaskan pada 20 September 2024, jam 8.30 malam, 21 dan 22 September 2024 pada jam 2.30 petang, bertempat di Auditorium Tun Azizan Zainul Abidin, Kompleks PPj. CAM adalah cerpen karya Zainal Rashid Ahmad yang memenangi Hadiah Sastera Utama bagi Kategori Cerpen Remaja Kumpulan Utusan 2002. Cerpen ini terkandung di dalam Antologi Teks Komponen Sastera (KOMSAS) Tingkatan 5 berjudul Sejadah Rindu.

CAM mengangkat tema perpaduan dan kenegaraan terutama ketika negara menuju kemerdekaan. Bertepatan dengan sambutan Hari Kebangsaan dan Hari Malaysia yang kemeriahannya masih terasa bahangnya. Selain itu, teater CAM kali ini mempunyai elemen seni budaya yang menepati objektif Festival Budaya Putrajaya 2024, seperti elemen muzikal, tarian, drama dan seni audio visual. Ianya turut ditawarkan secara percuma khas kepada pengunjung Festival Budaya Putrajaya 2024. Walau bagaimanapun, tempat duduk adalah terhad. Oleh yang demikian, semua peminat teater digalakkan untuk mendapatkan pas masuk lebih awal dengan

mengimbas kod QR yang disediakan di poster yang telah dimuat naik di media sosial rasmi PPj

Teater CAM adalah merupakan karya pertama yang akan diterbitkan oleh PPj dalam usaha menjadikan Putrajaya sebagai hub seni budaya terutamanya teater. Hasrat ini adalah selaras dengan matlamat untuk menggalakkan pembudayaan gaya hidup sihat yang seimbang dalam kalangan komuniti dari aspek kesihatan fizikal dan mental, seperti dihasratkan oleh YB Dr Zaliha Mustafa, Menteri di Jabatan Perdana Menteri (Wilayah Persekutuan). Cadangan asal pementasan teater CAM adalah hasil cetusan idea YBhg. Dato' TPr. Fadlun bin Mak Ujud, Presiden PPj yang ingin melihat Putrajaya menjadi destinasi bagi penggiat seni teater berkarya kerana kemudahan infrastruktur sedia ada di sini amat sesuai menjadi lokasi perkembangan seni dan budaya.

Melalui usaha ini, diharapkan Putrajaya dapat menjadi pusat penting bagi perkembangan seni budaya, sambil mempromosikan kepelbagaian warisan budaya tempatan dalam usaha menarik minat pelancong dari dalam dan luar negara.



(SITI FADILAH BINTI RAMLI)

Pengarah

Komunikasi Korporat

Perbadanan Putrajaya

Tarikh: 7 September 2024

Keterangan lanjut berhubung siaran media ini, sila hubungi Pegawai Media PPj, Encik Asmawi bin Ahmad di talian 012-6155516 atau Puan Haryani Binti Kaulan di talian 019-383 1564.